

MPAWO JESU WAKABOOLA



... a ku Zina pati lya Mwana Wako uunanikidwe, Mwami Jesu Kristo. Twa Ku lumba ku Buumi Bwakwe, a ku luzyalo Lwakwe lwakatilwa cakupaya mu myoyo yesu, kwiinda ku Muuya Uusalala.

² Ikuti na twaima, kubala zilongezyo zinji zya kapegwa kuli ndiswe, inga tee zyabalika pe. Tuli lumbide ku nseba zyesu, aku zilongezyo zyoonse zipati ezyo mali ngozi takonzyi kuula. Wa kacita cabuvubi, ku luzyalo Lwako, kutu vwapika. Alimwi tuli bantu bala acoolwe caku Ku ziba.

³ Alimwi myoyo yesu iyandisya kuti abo bata Ku zyi, abatakwe bulongwe kuli Nduwe, kuti bazibilane a Nduwe, a zibi zyabo zijatilwe, a kubaa bulongwe kuli Nduwe, Taata. Nkambo Wa kati, “Ndili mubombe a mutete. Alimwi ciingano cakali cuubauba a mikuli yakali kubwezeka.” Mpawo twa komba buyo kuti Uyu bunune ceeco kuli umwi aumwi sunumasiku. Ikuti na kwaba bamwi ano kucoolwe bata Ku zyi, akube kuti baboole sunumasiku ba Ku tambule. Gwasya Banakristo mbuli mbo bayabuya. Longezya inyimbo ezi, sunumasiku, zizwa ku i—i ku bantu baimba.

⁴ Alimwi kotu gwasya mu lubukulusyoo luboola. Aya masiku osanwe, Mwami, tu limvwa kuti inga lwaba luyando Lwako, kuti tu tuula masiku aya ku mulimo, katutana buyo kusekelela bubuke bupati; a kubambulwa, bubuke bwa Mwami wesu.

⁵ Koba andiswe lino. Boola ku Ijwi Lyako, Mwami, aku tukutaukila, alimwi akube kuti tube a luswaanano ku Ijwi, kwinda ku Muuya wa Leza. Mu Zina lya Kristo twa lomba. Amen.

⁶ Ncoolwe cili boobo kusola kwiima kumbele lya muntu onse, kwaambaula makani aa Mwami Jesu. Kwalo Nda kabona, mu mulimo wangu, tacikwe makani buya kuli Leza, naa kuli bali kkumi ababili, na kuli bali zyuulu. Walo ujisi Mulumbe omwe ciindi coonse ku bantu, luli nduzyalo Lwakwe.

⁷ Ciiyo cesu sunumasiku, citalikila kusule akumwi kubambwa kubotu loko kwa Lugwalo. Ndi yeeya kuti Lugwalo loonse luli londokede buya. Taakwe butongo bukonzya kujanja mu Ijwi lya Leza. Lili londokede buya. Pele, cibalo eco nco tubikkide kungsi lya kulanganya, ncimwi ca zibalo zipati zya Lugwalo. Ncimwi ca zinamatizyo zya Bumesiya Bwakwe.

⁸ Nywebo mulizi, bantu inga basika ku nyika eyi, aku konzya kupanga misyobo yoonse ya twaambo a misyobo yoonse ya zisyomezyo, pele ikuti na taba konzyi kuzulizya zisyomezyo ezyo, baa, zisyomezyo zyabo tazigwasyi loko. Pele cindi muntu

aboola a kukonzya kupa cisyomezyo, elyo mpawo kakonzya kucizulizya cisyomezyo eco, eco cibamba ijwi lyakwe kuba kabotu.

⁹ Elyo Wa kali Muntu alikke oyo wakasola kupona aa nyika, wakali kukonzya kwaamba kaambo aka kakuti, “Ndi jisi nguzu zya kulazika buumi Bwangu, alimwi Ndi jisi nguzu zyaku bububusya alubo.”

¹⁰ Nda kali acoolwe mu mulimo wangu, kwiima muni lya zyuumbwe zya basikutalisya banji bapati iba bukombi, basikutalisya bapati mbuli Mohammedi a bunji bwa bukombi bumbi bubotu loko bwa inyika. Pele bumwi abumwi bwabo ujisi busena bugwalidwe awo sikutalisya wabo mpa kafwida, akuzikkwa, a kulala awo kusikila buzuba obuno.

¹¹ Alimwi mbuli, ku bulenge, Nsena bedede acoolwe cakwiimikila muni lya kaako kabanda oko Kristo nkwa kalede, nkabela cuumbwe tii caka Mu jatilila. Nkambo Wa kali Nguwe Oyo wakati, “Nda lazika buumi Bwangu; taakwe muntu uubugwisya kuzwa kuli Ndime. Nda bulazika nkabela Nda bubusya alimwi.”

¹² Alimwi bwalo mbukombi bulikke mu inyika bukonzya kutondezegwa kululama, bwalo mbukombi bwa Bunakristo. Mwami wesu, kutali buyo kuti Wa kafwida bantu Bakwe, pele Wa kabuka alubo ku kululamikwa kwabo. Nkabela Uli tintide Kujulu, sunumasiku, a kukkala aa Cuuno cabwami ca Leza. Alimwi Muuya Wakwe ulapona mu Mbungano Yakwe, antomwe abantu Bakwe, kacita zintu nzyoonya Nzya kacita cindi Na kali waano aa nyika; kuzumanana mulimo Wakwe.

¹³ Kumane cifumo cino, Muuya Uusalala waseluka cakweebeka loko akutuvunika mu bweebesi Bwakwe bupati, Nda nanikidwe buya ku kanana majwi ayo a kwaamba kuti, kuti, buzuba bumwi bwabulemu zipego zyoonse zili mu mbungano ziyo bikkwa buyo ambali, aa cibaki, mbuli mbo zyakabede. A Muuya Uusalala, Mwini, uyo endelezya Mbungano buli boobo, mu luyando lwa Buleza, kusikila balwazi baya kuponesegwa, boofu baya kubona, balema bayo enda, kakutakwe kubikkwa maanda ali mbabo. Luya kuba lukamantano lomwe lupati.

¹⁴ Alimwi cindi ni twa kaimikila cifumo cino, mu musela a ciindi motu bedede, a kubona oyo muntu keenda . . . na ukkede awa amutwe wakwe kuukoteme akati ka magondo akwe, ujisi cilwazi caku boongo bwaku moongla bwaka mudiimanya boobu, aku mulemanya. Elyo kuciindi nakkede alya, watalikide kuzungaana konse akonse, oko kusle.

¹⁵ Mpawo kubona muntu oyo kujoka a kukkala acuuno, kumane kuboola kwiinda mu mundando wa mipailo, elyo kuziba kuti wa kwaamba kaambo, a kuti, kwa myaka minji, wa kajisi buyumuyumu loko kumvwa mu matwi akwe, elyo kubona Mwami Jesu kaajula ayo matwi caculondoka loko, kusikila ula konzya kukumvwa kuvwiyavwiya kwaansi maningi. Kujoka a

kukkala ansi a kubikka maanza akwe ku matwi akwe a kulila. Walo ngu simakwebo; muntu weenzya mamaile ali myaanda kuzo sika kookuno.

¹⁶ Mpawo, kumane obo, aa cibumbili, bumboni bwa bana abo kaba boola okuno, bantu abo bakali mu buyumuyumu bubbi, ku misyobo yoonse ya malwazi, kuzwa ku cisi coonse, kabapa bumboni bwa buyumuyumu bwabo, a nzila mbo bakali kufwa ku kkulenge a zintu zyandeene. Balo mbaaba we, kabali kabotu, kabaponede. Oko nkusimpikizigwa kumwi kwa Bumesiya Bwakwe buzumanana.

¹⁷ Kwalo nkusimpikizigwa kuti Bunakristo Mbwini. Taakwe bukombi bumbi buli Mbwini pele Bunakristo. Elyo bwalo Mbwini. Kristo walo Mbwini. Elyo Wa . . . I bukombi bwa Kristo tii bwakafwa antomwe a Kristo. Kwayanda bwakafwa antomwe Nguwe, pele bwa kabuka antomwe a Nguwe, awalo. Elyo Walo, sunumasiku, uci butondezya Bumesiya Bwakwe bupati.

¹⁸ Twa kayiisigwa, mu bbuku limwi liniini eelyo Nde kali kubala ciindi cimwi cainda, litegwa, *I Sibwami wa Ng'anda ya Davida*, Ndi syoma kuti lya kalembwa a muntu uutegwa Ingraham, alimwi liyeeyelwa boobo, cibeela ca ndilyo, mbwini, alya kagusigwa ku malembo amwi akaindi, kuzwa ku malembo aa cikutu ikuzwa ku myaka, minji minji yakainda, kuti kwakali mu Juda mukubusyi, mu Palestine, ku ciindi nciconya Jesu nakaliko. Elyo waa, kali kulembela bawisi mu Alexandria, wakali kusinsinkanya kukwabana a bawisi, kujatikizya Johane Mubapatizi a Jesu oyo wakaliita Mwini kuti “Mesiya.” Elyo mukati muya upa cifwanikiso cibotu ca kubambwa kwesu sunumasiku.

¹⁹ Waa kaamba kuti Marta a Mariya a Lazaro bakali balongwe bamunsi kuli Jesu. Kutu, kwiinde lufu lwa Josefa, kuti ba kaunka . . . Wa kaboola kuona ambabo, a kuba ambabo. Lazaro wa kali kwiiya kuba mulembi wamu tempele. Elyo Marta a Mariya bakali . . . Teeba kajisi bawisi a banyina. Aboobo, bakali kupanga zifwanikiso akulukaluka kuniini kwa tempele, milembo a zintu ziniini, milimo yakusuma, nkabela eco cakabapa cintucimwi cakucita. Kwalo Jesu wakasika kukkala a mbabo, Ka tana sola kuliyubununa Mwini kuti Wa kali Mesiya.

²⁰ Alimwi Lazaro wakali kunselelo ku mulonga, kuyo mvwa kukambauka kwa Johane. Aboobo wa kapiluka a kubaambila eco musinsimi mupati nca kayutukil kazwa ku Galilaya, kuzwa mu nkanda, a ceeco nca kali kwaambilizya, cakuti kuboala kwa Mesiya kwakali afwaafwi. Elyo Lazaro muniini wakalizi kuti Oyo nguonya ngwa kali kukananina wakali Mesiya, Mwini.

²¹ Mpawo buzuba bumwi wa kasungilizya Jesu, mbuli mbo kwakabede, kuunka kunselelo a nguwe, kuyo swiilila oyu musinsimi kakambauka. Walo Johane, kunselelo okuya, kata

sakatidwe a majwi mapati akulitukumuna; muntu buyo uzizilwe, katasamide mbuli mupaizi mupati.

²² Nkambo, Leza ta kkali mu nzila njo tusama. Leza takwe ndaba maningi kujatikizya nkuko, kufumbwa kuti katu samide cakulilemeka kabotu a kuboneka kabotu. To elede kunyona kkola lyako, na kusama citambala cipati ku mutwe wako. Leza uyanda kuti ube a moyo, mubombe weendelezegwa. Nce ncico Leza nca yandaula.

²³ Kuciindi nakabona Jesu kaboola antomwe a Johane, ku lubbizyo lwakwe, Johane wakanyona a kulanga, a kuti, “Amubone Kabelele wa Leza oyo uugusya zibi zya inyika.”

²⁴ Elyo cindi Jesu nakamana kubapatizigwa kuli Johane, ba kati Wa kabweeda ku muunzi wa Lazaro a Marta kumane. Alimwi ciindi Na kali kupona okuya, kalya ku tafule lyabo, koonu mu malo abo omuya mu Betani, mpawo buzuba bumwi Leza wakakanana kuli Jesu a ku Mwa ambila kuti, “Ndi yanda kuti Uzwe mu busena obu, uunka oko Nkweta Ku tondezye.”

²⁵ Lino, tu lizi kuti Bbaibbele lya kati, mu Musalali Johane 5:19, Jesu wakati, “Nse citi cintu cita Taata wa Ndi tondezya lutaanzi ceeco cakucita.”

²⁶ Alimwi lino Leza wakacita ku Mu tondezya, mpawo, ceeco cakucita, nape Na takazwa mu Betani. Aboobo Wa kazwa, lweendo lutandila kutola buzuba bomwe, na obilo.

²⁷ Elya ciindi nicakali kuyabuya, Lazaro wakaciswa, mpawo batumina Jesu kuti aboole. Pele, mubusena bwa kaboola, Jesu taka kubikkila maanu kwiitwa.

²⁸ Lino sa inga tii cakubamba kulimvwa bweenzu ikuti na mweembeli wakacita ceeco? Inga cakubamba kulimvwa boobo, “Ee, ta kwe ndaba a ndiswe pe.”

²⁹ Pele, oh, ikuti na mwakonzya kwiima aniini, akuyeeya ceci, kuti, “Zintu zyoonse zila beleka antoomwe ku bubotu kuli baabo bamuyanda Leza.” Taakwe cintu mu inyika cikonzya kulubila, kufumbwa kuti koli muli Leza. “I ndyato zya mululami zila laililwa aa Mwami.”

³⁰ Kumane mpawo baka tuma alubo kuli Jesu. Elyo Walo, mukulibonya, kutabikkila maanu ku kwiita kwabo nkabela waka zumanana buyo ncobeni. Kwiinde mazuba one akainda, Wa kati, “Mweenzuma wesu, Lazaro, uloona, elyo nkambo ka ndinywe Nda botelwa kuti tii Nda kaliko.” Nkambo, ikuti Na kaliko okuya, niba kasola ku Mu bamba kucita cintucimwi eco catakali mu luyando lwa Leza.

³¹ Oh, obo Mbwe konzya kwiima awa asyoonto! Obo kuti, ziindi zinji, a makanze mabotu, bantu basola kwiita bantu kuzwa mu luyando lwa Leza. Ii muntu weelede kukuziba kwiitwa kwakwe kumaninide. We elede kuziba eco ncoli mukucita, alimwi kutali buyo nzila ya cibukilambuta, na kulekela mali

kukukwela kuzwa ku busena bomwe kuya kuli bumbi, na mpuwo ku cicita. Takukwe makani obo mboli simpuwo, obo mboli muvubi, lyoonse weelede kuyandaula Leza lutaanzi, ku kuziba bubambe Bwakwe a luyando Lwakwe.

³² Lino, cindi Lazaro naka cisidwe, cakali kuboneka bweenzu kuti Ta kabweeda. Pele Jesu wakati, “Ndili kkomene kuti tii Nda kaliko okuya.”

³³ Nkaambo, niba ka Mu sungilizya, kwaamba kuti, “Lino, nkaambonzi To booli kubusena *okuno*? Nkaambonzi To citi *ceeci*? Alimwi nkaambonzi To mu busyi? Wa kababusya bamwi.” Pele, Jesu wakalizi kabotu. Jesu waka lulizi luyando lwa Taata mbo lwakabede.

³⁴ Elyo, oh, ino ncoolwe cilelekedwe mbo cibede, kuti inga twa buziba luyando lwa Taata. Ikuti na tuyo muyandaula Leza, Leza uyo luzibya luyando Lwakwe.

³⁵ Inga ndasala kuziba kuti Nda kali mu luyando lwa Leza, ikuti na Nse kakanana ku muntu umbi, kwiinda kukambauka ku bantu bali zyuulu zili kkumi busiku abumwi, kalutali luyando lwa Leza. Inga ndasala kuluziba luyando lwa Leza. Ndi syoma kuti wakali Davida oyo wakati, “Inga ndasala kuba cilyatilo ca mulyango ku i,” na cintucimwi, “ku ng’anda ya Mwami wangu, kwiinda kukkala mu matente antomwe a babi.”

³⁶ Ino ncoolwe, kujana busena bwesu a kukkalilila awo. Takukwe makani obo dyabulosi mbwa zungaana, eco nca amba, a nzila mbwa sabula, amukkale ncobeni cigaminina mu luyando lwa Leza.

³⁷ Amubone, mpawo, cindi Jesu nakati, “Lino, uli—uli fwide.” Ba kayeeya kuti wakali koonna. Wa kati, “Uli fwide. Elyo nkambo ka ndinywe, Nda botelwa kuti tii Nda kaliko okuya. Pele Nda inka nka mubusye.” Oh, ma! Tii cakali obo, “Nda inka kubona ikuti na Nda konzya; Nda inka kuyo sola.” Pele, “Nda inka nka mubusye.” Nkambo, Wa kalizi, Leza waka Mu tondezya kwiinda ku cilengaano, kuti Lazaro uyo buka kuzwa mu cuumbwe eco. Alimwi tii wakali mulimo wakuyeeyela. Oh, ikuti na Leza. . .

³⁸ Kufumbwa ciindi eco Leza atondezya cilengaano ca ceeco ciyo citika, ci yooba mbubonya mu nzila eyo, ikuti na cilengaano cizwa kwa Leza. Ceelede buyo kuba! Obo Mbwe konzya kwiima awa mu cibalo cangu, a kubalulula buyo, kwa maora, aa twaambo oto Ntwe zyi.

³⁹ Nda kaunka ku twaambo oko Nkwe kayeeya kuti, “O Leza, ncobeni Uyo cicita,” kuunka buyo a kusola kusunka buyo lusyomo lwangu kuli ncico. Pele ziindi zinji ta cibeledi.

⁴⁰ Pele cindi Leza atondezya cilengaano, oh, ma, ceelede buyo kucitika. Ta cikonzyi kukakilwa. Elyo nkaambo kakuti Ula cicita lino, ncizibyo citakakilwi kuti Ucili Mesiya, kuti

Bumesiya Bwakwe bunamatikidwe ku zitondezyo a zigambyo zya kusimpikizigwa kwa Ijwi Lyakwe lilelekedwe.

⁴¹ Alimwi mpawo kuyeeya, kuti, Lazaro, cindi nakaciswa. . . Taakwe muntu uuziba bulwazi mbobubede kusikila bwa kusikila mu ng'anda yako ini. Alimwi Ndili masimpe kuti umwi aumwi wesu, sunumasiku, inga wafwida lweetelelo kuli Marta a Mariya, obo sikuba janina zinkwa alikke ngo baka jisi, munyina wabo, kalede kaciswa mu bulo. Elyo antela bamadokotela baka mulanzya buyo meso. Twa kaambilwa kuti wakafwa nkambo ka kuzwa malowa mu mapunga, antela kakali kakweekwe. Mpawo wa kafwa ku cilwaza eco. Alimwi cindi na kacisidwe loko, nkabela dokotela waka mulanzya buyo meso, elyo mpawo Jesu wakakilwa kuboola ku mweenzinyina Wakwe.

⁴² Lino, eco cakali ciindi cisiya ncobeni. Sa inga mwayeeyela abo balindu bakubusyi bobilo babotu kabatumina Jesu kuboola, mpawo Wa kakaka kucicita? Niba kamana kuzwa mu mbungano a kukaka bukombi bwakaindi bwa Othodokisi, alimwi bakali pambula beni kuzwa ku balongwe bambi ba inyika; alimwi mpawo ba kali kubikka kusyoma kwabo konse mu Muntu oyu, Kristo, Oyo ngo bakasyoma kuba Mesiya, Kristo; elyo mpawo Wa kaba lekelezya!

⁴³ Oh, toonse twa kali ujisi musyobo oyo wa luzibo. Nda yeeya cindi Ne kasanduka lutaanzi, nzila bantu bangu mbo bakali kuyeeya kuti Nda kasondoka. Ee, ba kati, "Ikuti na kobamba musyobo oyo wa bukombi, uyooba mu kabunga kalanganya basondokede mu mazuba masyoonto." Wakali cijisi cintu nciconya, ca bantu kaba kufubaazya, a balongwe bako baamba kuti wakaleya kuyaku kumamanino malamfu. Pele kufumbwa kuti lusyomo lwako kaluli muli Kristo, zintu zyoonse ziyo yutuka kuba kabotu. Uta libiliki kujatikizya ceeco. Alimwi inga Nda yeeya nzila bantu. . .

⁴⁴ Nda kali kunga ndaswaana mweenzuma mulombe, a basimbi baniini abo Mbe kali kuunka abo, kuba swaana mu kagwagwa. Elyo wa kati, "Billy, wakaba mubumbulusi uusalala." Nse kajisi ndaba, nkambo Nda kalizi kuti cintucimwi cakacitika, cintucimwi cakatola busena.

⁴⁵ Alimwi, mu moyo wangu, Nda kausyoma kuba Muuya Uusalala, wini ncobeni. Myaka ili makumi obilo ayone yakainda, alimwi uli jatilide buyo awo asunumasiku. Ndi jisi kukanza nkukonya kwa ku Mu belekela, mbuli Mbwe kacita busiku butaanzi ni Nda ka Mu syomezya, mu ziyobwedo ezyo zyankuni ziniini zyakaindi. Nincobeni. Cintucimwi caka jata! Maora amudima asika. Mause asika. Kutyompwa kwasika. Lufu lwasika. Pele, mu busyu bwa ndulo loonse, Nda yaama ku bulangizi obo bubotu Mbwa kaamba kuti, "Ndime bubuke a Buumi; oyo usyoma muli Ndime, nokubakuti wakali fwide, kwalo uyo pona."

Lusyomo lwangu luyakidwe kutali ambi cita
 Aa bulowa a bululami bwa Jesu;
 Cindi bonse buntu bwangu bwapa nzila,
 Mpawo Walo mbulangizi a kukkala kwangu
 koonse.

Ali Kristo, Mwaala muyumu, mpo twi imikila;
 Masena oonse aambi ngu musenga uubbila.
 (Nincobeni!)

⁴⁶ Oh, kweelede kuti cakali ciindi camudima; cindi dokotela wabo naka balekelezya, cindi mweenzinyina na kabelekelezya, mpawo Lazaro wakali kufwa lino. Mpawo buzuba bwane bwakasika, nkabela wakazwa malowa ku ciindi cakwe camamanino, a kuunka kuyooba a Leza. Ba kali mutolede; baka gusya bulowa kuzwa ku mubili wakwe akubikka tununkilizyo amafuta ategwa nardo aadula mu nsinga zyabulowa bwakwe, kamu vungaila mu cisila a kumulazika mu cuumbwe. Elyo wa kalilede omuya, mazuba one, kafwide. Mubili wakwe wakali kununka.

⁴⁷ Lino, kufumbwa muntu ulizi kuti mubili wabuntu ula zapauka kwainda maora atandila ku makumi ali ciloba aabili.

⁴⁸ Ako nkekaambo Jesu wakacita kubuka mazuba otatwe kataninga kukwana. Alimwi maora ali makumi ali ciloba aabili, kubola kulatalika kuba.

⁴⁹ Alimwi Davida, mu Bbaibbele, wakaamba, myaka ili myaanda ya lusele Kristo katana zyalwa, kungsi lya bunanike bwa Muuya Uusalala kati, “Nse kalekeli Umwi Wangu uusalala kubona kubola, naanka kuti Nka siye buntu Bwakwe mu gehena.”

⁵⁰ Ako nkekaambo Nca kati, “Muunyonyoone mubili oyu, nkabela Njo ubusya mu mazuba otatwe.” Wa kalizi kuti taakwe kubola kwakalino talika kuba. Ako nkekaambo Nka kafwida muli Bwasanu masikati, a kubuka alubo Munsondo cifumo, nkaambo kakuti Ta kaziba seelo lyomwe lya mubili oyo ulelekedwe lyaka konzya kugumwe kubola.

⁵¹ Nkambo, Ijwi lya Leza tali kakilwi nconzyo. Oh, ma! Ula libamba Ijwi Lyakwe, mbuli mbo kweelede. “Ta kalekeli Umwi Wangu uusalala kubona kubola, naanka kuti Uyo siya buntu Bwakwe mu gehena.” Ijwi lya Leza litakakilwi tiilya kakonzya kukakilwa. Mpaawo kwakalede mubili Wakwe.

Masimpe, bantu bakabuzya. Ba kati, “Mazuba a masiku otatwe?”

⁵² Pele, mwakali mumonya mu mazuba a masiku otatwe, Wa kaamba. Wa kalizi kuti nataka konzya kuba mazuba a masiku otatwe aazwide, nkaambo kubola nkwaka katalika kuba.

⁵³ Aboobo, ngooyu wakali Lazaro, mazuba one akaliindide. I mpemo yaka bobelede kale, ku busyu. I tunwe twakanyona

kale. I tuuka twa lukanda twa katalikide kale kukwakwalika mu mubili wakwe a kulya mubili wakwe.

⁵⁴ Oh, kweelede kuti lyakali oora lya mudima maningi oyo mukwasyi muniini ndo lya kasola kubona: Mweenzinyina waka unkide kumbi, mbungano yabo, bakali tandidwe, munyina wakali fwide. A bantu bakali kubasabula a kubaseka, mbuli basimbi abo bobilo baniini mbo bakkede antoomwe mu ng'anda, a zivumbyo zyabo zisiya ku masyu abo, mbuli cilengwa cakujwe mbo cibede, kabakkede alya, kabalila a koomoka, munyina wabo. Mbaabo mbo bakabede.

⁵⁵ Taakwe umwi cita oyo waka kkala mu musyobo oyo wa muunzi; taakwe umwi cita abo baka kkala muni lya bayandwa babo! Tu lizi, bunji bwanu mulizi, obo mbo tukkala muni lya bayandwa besu. Roy, Nda konzya ku kubona kokkede kumbali lya mulombe oyo muniini. Mukwesu Roberson, Nda konzya ku kubona a Mucizi Roberson kakkede muni lya banyina. Oh, mbangaye banu! Nda konzya kulibona lwangu nke kkede kumbali lya muvwanda wangu, muniini wakafwa, kutandila myeezi ili lusele yakukomena. Tu lizi zintu ezyo mbo zibede. Oh, ino maora aamusinze!

⁵⁶ Pele lyakali oora lya mudima maningi oyo mukwasyi muniini ngo lwa kasola kubona. Elyo kutandila ciindi eco. Jesu wakasika aa cilao. Kwalo, kanji, eyo nje nzila Mbwa cicita. Canoli mu mudima maningi wa oora, elyo mpawo Jesu ulasika aa cilao.

⁵⁷ Ca kali kulaale kumusanza mu Babuloni, cifumo cimwi, myaka minji yakainda, cindi bana botatwe ba Hebrayo, abo baka tolwa kumusanza okuya, kabali baange, kuzwa ku nyika yabo yakuzyalilwa, bakali uusine nkaambo bakali baange. Bakali uusine nkaambo kwakanyina busena bwa kukombela. Pele bakacili kupona cabwini kuli Leza. Mpaawo kwaksika nkamu ya basikweena, baka bikka kwaambilizya kwa mulao, wakuti, “Kufumbwa muntu utaka kotamini cikozyanyo,” eco cakaimpene ku bukombi bwabo, “uyo sowelwa mu bbila lya mulilo.” Alimwi mwaami, a koongolola kwakwe kupati kwaluuni, wakayutuka a kuti, “Kufumbwa muntu utaka kotamini cikozyanyo eci, weelede kunjila mu bbila lya mulilo eli a kuumpwa.” Lino, kwakaba ciindi cakusolekwa.

⁵⁸ Alimwi lyoonse kuli ciindi ca kusolekwa. “Oonse mwana uboola kuli Leza, weelede kusaanguna kusolekwa, kusunkwa.” Oh, Ndila ciyanda. Oh, Nse kwiitili, pele, kwamana kwind, kupa micelo mibotu ya lubombo. I ciindi cakusolekwa, cindi mulilo noupya! Obo Munakristo aumwi, kwiinda mu makkalo, mbwa kainda mu ciindi eco ca kusolekwa. Alimwi Bbaibbele lyakati, “Ikuti na ta tukonzyi kuzunda kusolekwa oko, tuba bana bamusokwe, a kutali bana ba Leza.” Aboobo, mwana wini mu ciindi ca kusolekwa, oyo wakaliko, taba keendi kwiinda kukubona. Meso abo aakunyama ali jalidwe ku zintu zili muni

lyabo. Ba leenda buyo ku lusyomo lwa Mwami Jesu Kristo, kulanga ku Ijwi Lyakwe, a kusyoma kuti Uyo libamba Ijwi lyoonse mbubonya buyo munzila Mbwa kaamba kuti Uyo cicita. Ciindi cakusolekwa, ca masukusyo!

⁵⁹ Elyo tula bona, cindi eci cakusunkwa ni casika ku bana aba botatwe ba Hebrayo, ba katondezya kuti bakali kukusyomeka. Ba kati, “Ta tuko cikotamina cikozyanyo.” Oh, ma!

⁶⁰ Mpawo, kwaambilizya kupati kwa mulao oko kwaka sainwa, ba kaunka a kuyo babunganya antoomwe, akwaanga maanza abo kusule lyabo, akweenda atala lya cipulanga cipati, mwa keendela, akulokela mu bbila lyakacitide mulengalenga kusubila ncobeni, kupya ziindi zili ciloba kwinda mbo lyakasoleda kupya. Elyo kuciindi nibakali kweenda atala lya cipulanga eci, mukuziba ceeco mu moyo wabo, tiiba kabona obo Leza mbwakali kuyo sola kucicita, pele ba kalizi kuti Leza wakali kukonzya kucicita. Cakali coolwe cabo ca kweenda mu lufu lwabo, mbuli mbo cakabede, ku kubamba Ijwi lya Leza.

⁶¹ Alimwi mbuli mbo bakeenda kuya kutala okuya, antela lyakali oora lya mudima maningi ndyo bakasola kubona. Tiiba kajisi—kajisi muunzi wa kuunka, aa nyika eyi. Ba kali baange. Ba kali buyo mbuli bazike. Ba kaletwa kuzwa ku nyika yabo yakuzyalilwa. Tii bakali kazumizigwa kuya ku kukomba ku masena aabuleya. Ba kali kukomba mituni mu cisi eco; aboobo tiiba kakonzya kuya kukukomba mituni, alimwi kwiina nibakaka konzya kubaa zyoolwe zya ku nyika yabo yakuzalilwa. Ba kali bazike. Pele, cintu comwe, to konzyi kwaanga musyomi kuzwa kuli Leza wakwe. Peepe, to konzyi.

⁶² Alimwi cifumo eco, mbuli mbo bakeenda kuya kutala okuya, kabazi kuti bakaimvwi balikke antomwe a Leza, elyo mbo baka talika buyo kubamba ntaamo zyabo, mbuli mbo bakali kutanta, antela, oora lya mudima maningi ndyo bakasola kusikila, a kupya kwa bbila kwaka talika kuvuluma ku masyu abo, mbo bakabambila buyo ntaamo zyabo zya mamanino mu kulaya nyika eyi, ansi mu bbila ely lya mulilo, mpawo Jesu wakasika ambali ku ciindi eco. Mpawo Wa kaselemukila mu bbila elyo lyakali kuyaka mulilo, kakwela mapalumu a masamu agilini lyonse kuzwa ku Julu, nkabela Wa kavupaula kuzima mulilo kuzwa kuli mbabo.

⁶³ Kusikila, nikwa kamana kupya, antela kwa oora lyomwe na ainda, mwaami waka katala koonse a kuti, “Amujule, nkabela atu bone caka citika.”

⁶⁴ Mpawo cindi niba vununa cijasyo cipati ca bbila lya mulilo, mpawo cijazyo cipati ca butale na lubulo cakaida ansi, mwaami waka langalanga mukati. Elyo wa kati, “Mbangaye mbo twa kabikkide omuya?”

Wa kati, “Twa kabikkide botatwe mukati.”

65 Wa kati, “Kuli bone mukati omuya. Alimwi Umwi waba ulibonya mbuli Mwana wa Leza.”

66 Inga casika kukusiya maningi, kusoselwa ziindi zinji, inga kwasika ciindi cakusolekwa, pele Jesu lyoonse uli a cilao ikuti na twaba buyo bakasimpe a basyomeka.

67 Wa kali mwanakazi muubauba ciindi cimwi, oyo wakabelesya mali akwe oonse, kuli bamadokotela. Alimwi waa kasambalide mpulazi, a inkamu, antela, a zyoonse nzya kajisi, waa kazisambala; a kupa bamadokotela, kusola kujana kuponesegwa. Taakwe wabo wakali kukonzya kumugwasya pe. Mbuli mbwa kakkede alikke, mubili wakwe muniini wakali pupungene, nkaambo waa kali kusweekelwa bulowa kwa myaka minji. Mpawo kwiina cintu cakalibonya ku mugwasya. Elyo kuli . . .

68 Waa kamvwa. Nywebo mulizi, “Lusyomo lulaboola ku kumvwa, kumvwa kwa Ijwi.” Waa kamvwa nzila obo kuya mu lubazu lumbi lwa Galilaya, kwakali Musinsimi okuya, Oyo wakali kuponya baciswa. Pele, ta kajisi mali aakubbadela kuzabuka lwizi. Ta kakonzya kukwasula bwaato, lwakwe; waa kali pupungene maningi. Kwalo ta kakonzya kuba a mali akubbadela muntuumwi umbi, nkaambo waa kaamanide kale onse nga kajisi, kupa bamadokotela, alimwi wa kacili bubu mbuli mbwakabede lyonse.

69 Cifumo cimwi, kuciindi ka kkede anze, mbuli mbo tunga twa yeeya, mu kkota, a minwe yakwe miniini kaikankama, kasola kulukaluka kuniini aa maanza na kuluka kubelesya tuwaya, mbwa kalangila ansi alya, kwakali coongo ciniini cakali kucitika mu lwizi. Elyo bwaato buniini bwa kanjila mu ziteo zitegwa wilo, elyo waa kacitika kulanga. Elyo kumane . . .

70 Waa kali kkede alya, kayeeya, “Lino mali angu oonse akamana. Ino Ndila cita nzi? Mvwiki itobela antela Ndiyo tandwa kuzwa mu ng’anda. Basikukweletesya mali aakuyasya ng’anda baitola eyo. Ta tujisi nociba cilyo ca kulya, naanka cintu cimbi. Mpawo Nse konzyi kwaanguluka.” Antela lyakali oora lya mudima maningi ndya kasola kubona.

71 Elyo kutandila ciindi eco, bwaato buniini bwa kalitontila mukati, nkabela Jesu wakasika ambali. Waa selemukila ku mulonga, a mubili wakwe, muniini uukankama.

72 Alimwi amuyeeye buyo, nkaambo Jesu wakaboola, dyabulosi aumwi mu gehena uyo sola ku musinkila kuzwa kuli Nguwe. Mbo mbubo. Inga waumvwa Mulumbe, pele dyabulosi uyo kkala mpoonya aa kkuko lyako, kaamba kuti, “Uta swiilili. Uta swiilili. Uta swiilili.” Pele uta mu syomi.

73 Wa kati, “Kufumbwa muntu uyanda, inga waboola a kunywa kuzwa ku meenda aa Buumi, apegwa buyo.”

Uta muswiilili, nkambo ngu dyabulosi.

⁷⁴ Mpawo mwanakazi muniini waka selemukila oko Jesu nkwakali kuboola, a bantu kaba Mu bungilila, bacete, abamwi bambi.

⁷⁵ Elyo mpaawo kwakaimvwi mupaizi a boonse i—i basololi bapati ba bukombi bwakwe. Mpawo bakali ku Mu fubaazy, a kuti, “Yaaya, Ndo Nduwe uuponya baciswa, embo na? Ee, tuli jisi banji baciswa. Atu Ku bone ubaponye. Ee, Ndo Nduwe ubusya bafu, embo na? Tuli ijisi namaumbwe iizwide kutala awa. Atu Ku bone ubabusye.”

⁷⁶ Ta kabikkila maanu naceya kuli mbabo pe. Wa kazumanana buyo kweenda. Wa kajisi cintu comwe cakucita, nceeco cintu Leza ncaa Mu tondezeze kucita. Taakwe cisyooonto na cintu ciindilila!

⁷⁷ Cindi Munakristo asika ku busena obo, oko nkwayo bikka ambali akuta swiilila bonse bubi buyoosya azintu zyaambwa, azyoonse zicitika, a kuba a kaambo komwe, ako nkakucita luyando lwa Leza, Leza ndwa kakutumina kucita kuya kuba buzuba bwindene a mbungano yiindene.

⁷⁸ Mpaawa waka selemukila ku bbunga lya bantu. Awalo Jesu wakali kweenda ambali, mu kweenda Kwakwe, kuniini kutonkomene.

⁷⁹ Lino bantu bakali kuzuzila Nguwe, a kwaamba kuti, “Sena Uli Musinsimi? Sena Uli *boobu*? Sena Uli *boobo*? Kwaamba, mbobuti kujatikizya kuboola okuno a kundi citila cintucimwi? Andi Ku bone kocita maleele. Tula yanda Ku kubona kuti usandule meenda kuba waini; nceeci cijaa cizwide ngawo. Ndi yanda kuba aumwi. Baamba kuti wakali waini munono. Kopanga waini *oyu*. Andi bone mbo unona.”

⁸⁰ Taakwe nakanusya nouba mutwe Wakwe. Wa kazumanana buyo kweenda. Eco cindibamba ku Mu yanda.

⁸¹ Nywebo mulizi, citola bantu baniini loko kukwankwana a kukazyanya. Ii muntu mupati ta bikkili maanu kuli cimwi mbuli ceeco. Banakristo taba bikkili maanu kuli ceeco inyika nco yaamba, ikuti na bayanda kwaamba cili coonse nco bayanda. Ba jisi. . . Mbapati loko kubona zintu ezyo ziniini. Bala zumanana buyo kweenda, kuyabuya buyo.

⁸² I mwanakazi muniini wakayeeya akuti, “Lino, nde oora biyo Ndeyo sola ku Mu bona; ciindi cangu camamanino. I coolwe cilikke eco Nce sola kuba aco. Alimwi Ndila syoma ncobeni, ikuti Nda konzya biyo kuguma cikobela ca Muntu oyo, inga Nda ponesege.” Ino lwakali lusyomo! Ino cakali ciindi!

⁸³ Elyo, awa, mbuli bbunga mbolisola ku mujosya, waa fugama ku mazwi akwe, munzila imwi, a kuyavula kwiinda mu bbunga eli, kusikila waa kagama cikobela Cakwe. Mpawo waa kajoka a kwiimikila mu bbunga.

Jesu wakanyona a kuti, “Nguni wa Ndi guma?”

84 Baa, bbunga lyakati, “Baa, taakwe muntu waka Ku guma.” Bantu boonse baka cikaka.

85 Kumane Petro waka Mu tapatila. Wa kati, “Mwami, bantubonse bakali kufumpa kuli Nduwe.”

Wa kati, “Pele Nda mvwa kuti nguzu zyazwa kuli Ndime.”

86 Elyo Wa kalanga koonse kusikila Wa kamujana. Nkabela Wa kati, “Lusyomo lwako lwa kuvuna.”

87 Oora lyakwe lya mudima maningi. Alimwi Bbaibbele lya kaamba, kuti, “Waa kalimvwa mukati kakwe, kuti kuba abweene. . .kuzwa bulowa kwakaleka.”

88 Tali nguwenya Mwami Jesu okuno cifumo cino ku mwaalumi uukkede alya kajisi kkulenge lisumpukide, kusikila walo, dokotela wakati, “Ula konzya buyo kupona kaindi kaniini”? Elyo mbwa indila buyo ku cipaililo, mu oora lya mudima maningi ndya kasola kubona, elyo ku maminiti ali kkumi aosanwe kaimikila kusule okuya, alimwi wacita kusika okuno akuti, “Konse kulimvwa kulema kwazwa kuli ndime.” Oora lya mudima maningi, mpawo Jesu wakasika ambali.

89 Mukwesu Burns ukkede alya, cindi. . .mulongwe Wakwe muniini mubotu uli mu Bulemu, sunumasiku. Obo mbo cakabede, wa kali lede omuya, mu cibbadela omuno mu Louisville, kajisi kkulenge muli mubengwa. Alimwi bamadokotela bakali kumulanzya buyo meso. Elyo Mukwesu Wood a Ndime twakali kubusena mu i-i cisaka, katu vwima basikaale. Elyo twa kajoka, nkabela cintucimwi cakandi sungilizya kuya ku Louisville. Nkaambonzi? Ta ndizi.

90 Alimwi Nda kati, “Mukwesu Wood, koenzya nkoonya ku kkona, Ndiya kuli ya Sutcliff. Elyo cindi wa bweeda, inga wandi bweza.” Nda kalindila a kulindila. Nse kakonzya kumujana ali oonse. Elyo nikwakainda kaindi, Nda kamubona kanyona kkona limbi, kaindilila kagwagwa, kayeeya kuti kakali kana Sutcliff kakali kagwagwa kambi kutala. Ikuti na muntu nakalanga biyo, na kakabona kana Sutcliff kuti tiika kaliko. Alimwi ulabeleka akana Sutcliff. Uli buzyi busen mpo bubede.

91 Pele Mucizi Burns muniini, oyo upumuna muli Leza, sunumasiku, waka liimvwi mu ng’anda yakwe; wakabweza cifoto eco ciniini a Angelo wa Mwami atala lya ncico, a kufugama kumbele lya ncico a kuti, “O Leza, ndigwasye kujana Mukwesu Branham ku mulumi wangu uyandwa.”

92 Mpawo waa unka ku musika mupati kuyo bbadela bbiilu lya malaiti, mukutaziba oko Nkwe kabede mu inyika eyi mpati. Elyo waa kasika. Nda kalindila kwa cisela ca oora. Mpawo Nda kazumanana kubona traki kaiinda ku kkona limbi. Nda kati, “Wa sweeka. Nde elede kuunka kutala okuya.” Lino Mbwe kasika buyo ku kkona, nkabela wa kasika ku kkona, kuli ndime

kuti ndinjile mu traki, alimwi kutandila buyo ciindi eco, Mucizi Burns wakuboola ku kkona.

⁹³ Elyo awo, a mupailo wa lusyomo, Leza wakaponya mulumi wakwe. Elyo ngooyo uli kkede sunumasiku. Mwakali mu mudima maningi wa oora, mpawo Jesu wakaboola ambali.

⁹⁴ Tu yeeya buyo kuti tuli sweekede alimwi tuli siidwe. Cindi watalika kulimvwa . . . Kozumanana buyo kujatilila, Uyo obako. Uta katali.

⁹⁵ Lyakali oora lya mudima maningi Georgie Carter muniini ndya kasola kubona, kumusanza okuya ku Milltown. Waa kali kuzulilwa ku mbungano eyo yatakali kasyoma mu kuponesegwa kwa Buleza. Ba kakuseka akukufubaazya kuponesegwa kwa Buleza. Elyo ngooyo mwanakazi muniini kalede mu ciimo eco. Walo Mwami wakakanana kuli ndime kumusanza kuno aa bulo, a kuti, “Koya kumusanza ku Milltown.” Nse kalina bumvwa busena.

⁹⁶ Nda kaboola ku cibumbili eci nciconya, elyo Nda kati, “I Mwami wandi tuma ku busena butegwa Milltown. Kuli kabelele kaniini ako kapatide koonse ku ziteo, alimwi kali kulilila lugwasyo.” Taakwe muntu wabuzi oko nkobwa kabede.

⁹⁷ Alimwi Mukwesu George Wright, waliko sunu kuseeni, wakati, “Ndi buzyi awo mpo bubede. Buli anselelo nselelo ku busena bwangu.” Nda kaselemuka mu Mujibelo utobela. Nda kayandaula koonse, a kutalika muswaangano mu mbungano ya Baptisti yakaindi.

⁹⁸ Mpawo Ba. Hall baka ndisololela okuya kuyo kombela musimbi oyu muniini, nkabela Nda kamu kombela. Bantu bakwe bakazwa ng’anda. Teeba kali kuyanda cakucita a nkuko, nkaambo mbungano yabo yaka baambilide kuti, “Kufumbwa bantu,” abo bakeenda mu muswaangano wangu, “bayo tandwa kuzwa mu mbungano.” Ngooyo wakali lede, kwa myaka ili fuka amyeezi ili lusele, kapapalete kusule lyakwe, kata konzyi nokuba kuputa. Waa kali lilide. Waa kali pailide. Kusikila, inga waunka, mane buzuba bunu, a kulanga. Bulo bwakwe bwa cifwanikiso cakuciswa, waa kalumwaide oonse—i penti kuzwa kusule lyaco, kalila kuli Leza, kuti kamucitila cintucimwi. Lino nekubaboobo, mbungano yakwe, itontola ya tulengwa tiyya kali kusyoma mu kuponesegwa kwa Buleza alimwi niyaka mukakila umwi wakali kuboola ku mukombela mu nzila eyo.

⁹⁹ Mbaabo bawisi bakali daikona, na cintucimwi, mu mbungano. Banyina a balo, minsende mapati mu mbungano. Elyo mbaabo baakakwa; bulangizi boonse bwakali manide. I bamadokotela bakamulanzya buyo meso, myaka yosanwe kakutanaba. Waa kali kulema biyo mapaundi ali makumi otatwe aciloba; taakwe cita mafuwa buyo. Maulu akwe maniini akali kuboneka mbuli tusamu twa zipyaango. Elyo ngooyo waa kali lede katakwe cintu cita lukanda buyo aa zifuwa.

¹⁰⁰ Buzuba bumwi, nkeselemukila kuya...Elyo banyina bakazuza; bawisi baka kazwa mu ng'anda. Taakwe cintu nco baka jisi cakucita antomwe a sikwiindilizya oyo. Mpwo buzuba bumwi, keenda mukati kuyo mukombela, Nda kati, "Omusimbi muniini, sa inga wayanda kubuka a kubapatizigwa mu Zina lya Mwami Jesu, ku kusanzya zibi zyako, akuyanda ku Mu belekela?"

¹⁰¹ Nda kacita kuswena kuti ndimve eco nca kaamba. Waa kati, "Ndiyo cita kufumbwa cintu." Nda kalanga, kalede ali bwangu...bulo bwakwe, elyo mpaawo kwa kabikkidwe bbuku lyangu liniini, litegwa *Jesu Ngu Mbobuca Nguwenya, Sunu, Amuya Myaaka*. Nda kamupailila, kuboneka kuti tii kwakagwasya pe.

¹⁰² Kwa nsondo zyobile Nda kajisi muswaangano. Nda kainka kutala kuyo bapatizya ku Totten Ford. Ku buzuba obo muswaangano wakali kumana, busiku obo. Elyo kuciindi nkebbizya...

¹⁰³ Kwakali mukutausi umbi kutala okuya wakaseka a a kufubaazyza njionya miyeeyo ya lubbizyo lwa maanzi, a kubelesya Zina lya Mwami Jesu Kristo. Wa kati, "Ikuti na umwi wa bantu bangu abo bakkede kungsi lya tente eli, bakasola kuba muni lya muntu, muzwe awa lino. Nse yandi cintu cakucita a mbabo." Elyo Ba. Wright bakacitika kuti bakali kkede awo, nkabela wa nyamuka akuzwa. Moonya Munsondo mwakatobela... Nse kaujula mulomo wangu a kwaamba bbala kujatikizya mwaalumi.

¹⁰⁴ Alimwi Nda kazumanana kutala kuya, ku busena bwa kuba...ku bapatizya kutala kuya ku Totten Ford. Elyo cindi Ne kanjila mu maanzi, mpaawo kwakaimvwi bantu bakazwa ku lubukulusywo lwakwe, kabaimvwi aa nkomwe, kuzo ndifubaazyza nkambo kakubapatizya mu Zina lya Mwami Jesu. Cindi Ne kazwa mu maanzi, kutandila ciindi eco Jesu wakaboola ambali.

¹⁰⁵ Mpaawa kwa kaboola mbunga yakwe yoonse, kaba samide zisani zyabo zibotu, kabacovwaila mu maanzi ayo antimba loko, aumwi kakwila kuti, "Leza kondi fwida luse!" Elyo Nda kabapatizya umwi aumwi wabo mu Zina lya Jesu Kristo, moonya muya mu ciziba eco ca maanzi.

¹⁰⁶ Kozumanana kuya kutala kuli ya Mukwesu George. Mpawo Mukwesu George wakati, "Mukwesu Branham, koboola ku cilalilo mu maminiti masyoonto."

¹⁰⁷ Nda kati, "Nde elede kukomba." Nda kaunka mu zisaka, nkabela tii Nda kakonzya kukomba, okuno a kokuya. Elyo mpoonya buyo, cindi nikwatandila kusiya, Nda kalanga, elyo mpaawo kwakali Mumuni wakali kumweka ansi kwinda mu ziteo zya mumbu, akuti, "Buka kuzwa ku matende ako, imikila ku matende ako, akuya ku nzila ya Carter."

¹⁰⁸ Georgie muniini kalede alya, kalila, kaamba kuti, “Oh, baama, Ndila siigwa. Ula unka sunu, nkabela Nse kakonzyi ku mubona limbi.” Oko kwakali kuswaangana kwa kujala, masiku ayo, kwa lubukulusyo lupati. Ngooyo mbwa kabede, a bulangizi boonse kabumanide, mbo kwaaboneka. Mpawo kutandila kuciindi eco, Jesu wakaboola ambali.

¹⁰⁹ Walo mwanakazi oyo muniini kalede awo, wa mapaundi buyo aali makumi otatwe mu kulema. Cindi Ne kanjila omuya a kumu bikka ku janza, Nda kati, “Omucizi, Mwami Jesu walibonya kuli ndime kaindi kainda, okuya ku lubazu lwa cilundu eciya. Wa amba kuti ndiboole okuno kuzobikka maanza angu ali nduwe, kutegwa uponesegwe.”

¹¹⁰ Obo bupange, buniini bwa mafuwa bwata kabukide kuzwa mu bulo kwa myaka ili fuka a myeezi ili lusele. . . [Kabeela katakwe cintu aa teepu—Mul.] . . . bwakaimikila ku matende akwe a kubindila ku piano, a katalika kulizya kuteeti:

Jesu, kondi swenya ku ciingano,
Kuli Kasensa kayandisi,
Kabuyo kuli boonse, kalonga kakuponya
Ako kakunka kuzwa ku cilundu ca Kalivari.

¹¹¹ Lyakali oora lya mudima maningi eelyo Georgie ndya kasola kubona, mpawo Jesu wakaboola ambali.

¹¹² Mwiiminizi wa mung’anda ya milawo Willie D. Upshaw, myaka ili makumi aali cisambomwe acisambomwe keendela mu wiluceya, wakali kutontwa buya kuzwa ku Buyake bwa milawo, kuyaku busena a busena. Wa kakombelwa, myaanda ya ziindi. Wa kali mweendelezi utobela wamu Nkamu ya Baptisti ya kumusanza, Baptisti ya Kumusanza. Ii muntu mulemu, muntu mubotuloko, muntu oyo wakali nooba Muleli mu United States, mu 1926, ikuti naka busambala bupati bwakwe. Pele, wakali kuusulaika whisky. Kwalo wa kaimikila aa tiketi lya milawo ya kukasya, cindi parti ya Demokrati niya keelede kamusala. Ba kati bayo cita, nkabela niba cicita. Nkaambo, na kakonzya kucicita cabuteteete. Wa kali kuyandwa kabotu.

¹¹³ Pele wa kati, “Inga nse sintanya bupati bwangu bwakuzyalwa, kukuba Muleli wa inyika.” Aleluya! Leza kotupa baalumi mbuli baabo, mu White House yesu. Iiyi, munene. Mbobuti mbwa konzya kulala mpawo kali mulema? Sule Lyakwe lyakali tyokede, kuzwa nakali a myaka ili kkumi aciloba yakukomena, mpawo awo wakali makumi ali lusele acisambomwe.

¹¹⁴ Busiku bumwi, kulaale, kumbele lya makumi aa zyuulu zya bantu, cindi Roy Davis naka mutumina kubusena kuya. Wa ka mweenzya mu whiluceya, Roy nakamana kumu kombela, abamwi bakali myaanda. Elyo Nse na mvwide zya muntu, mu buumi bwangu. Ngooyo mbwa kabede, kakkede kusule okuya, moonya mu muswaangano umbi. Nda keenda kutanta cibumbili.

Elyo kutandila ciindi eco, Nda kalanga, elyo Nda kabona bwizi bwa banyama, a mulombe muniini kasobana. Mpawo Muuya Uusalala mbuwa katalika kuyubununa, Wa kamu tondekela a ku mwaambila kuti wakali mwiiminizi wa mung'anda ya milawo, akuti Jesu Kristo waka muponya.

¹¹⁵ Kuya, walo, wakalemene, myaka ili makumi ali cisambomwe acisambomwe mu whiluceya, myaka ili makumi ali lusele acisambomwe yakukomena, oora lya mudima maningi ndya kasola kubona. Bulangizi boonse bwakali manide, bwa kuponesegwa kwakwe, mpawo Jesu wakaboola ambali. Kwalo muntu, wakali mu wiluceya kwa myaka ili makumi ali cisambomwe acisambomwe, wakabuka a kuzuzila ku cibumbili, ku myaka ili makumi ali lusele acisambomwe yakukomena, a kuguma matende akwe, a kusotokela mujulu aansii. Linoo wakaimikila mu muswaangano wa Billy Graham a kwiimba lwakuti *Ndi Yaama Ku Maboko Aateeli*, aa matantilo aaku White House. I oora lya mudima maningi, mpawo Jesu wakaboola ambali.

¹¹⁶ Lya kali oora lya mudima maningi Abrahamu ndya kabona, cindi na kali myaka ili mwaanda yakukomena, mpawo Jesu wakasika ambali.

¹¹⁷ Busiku bumwi kumane kukambauka kwa ciindi cilamfu, Wa katuma basikwiiya Bakwe kuya kumwi. Lino baka njila mu bwaato a kuzwa kakutakwe Nguwe. Kwa kaboneka mbuli, kuti, cindi Na kacita, mpawo uli mu lwizi, bwaato buniini bwakali obo. Mpawo guwo liniini lyakayutuka. Elyo dyabulosi wakati, “Nda batantamuna kuli Nguwe lino. Nda bagusya aba babumbulusi basalala kuzwa kuli Simalela wabo. Njo bona na Mulumbe yongaye njo baya kutola ku inyika yoonse. Njo munyikizya umwi aumwi wabo okuno.”

¹¹⁸ Aboobo, mpaawo kwakasika guwo pati. I dyabulosi wakatalika kufusa kuyoya kwakwe, mpawo guwo lya kayutuka. A bwaato buniini bwakatalika kutotaikwa kuya mujulu ansi, mbuli *boobu*. I kweenda kwakanyongana. I ziyambyo zyakatyokauka. I bwaato bwakazula maanzi. Calo cakali ciindi ca mudima maningi. Kwiina kuzumbauzya bakali kujatililana ku zibuno, a kulila. Ba kayeeya, “Oh, ino Wa unka kuli? Ncinzi caka Mu citikila? Nkaambonzi tii twa lindila aku Mu tolelezya antoomwe a ndiswe? Nkaambonzi titwa Mu leta mu bwaato?”

¹¹⁹ Alimwi ziindi zinji, inga wayeeya cintu nciconya. Mweenzuma wangu, kwayanda waka unka Ka tawo, pele, yeeya, Walo uci kulangilila. Uli zyi kabotu awo mpobede. Inga kakuli mapenzi mu ng'anda yako. Inga kakuli mapenzi mu buntu bwako. Inga kakuli mapenzi mu mubili wako. Kufumbwa mbo cibede, uta pengi. Walo ubikkide meso Akwe ali nduwe. Ula kulangilila.

120 Wa katanta atala lya mulundu. Wa kali kulanga okuya, mpawo Wa kabona mancenjela oonse ayo dyabulosi nga kali kucita. Aleluya!

121 Ta katanta biyo, pele Wa katanta bwaanda bwakucingilizya ibwa Kalivari; kutali biyo ku Kalivari, pele a bwaanda bwakucilizya ibwa Bulemu. Elyo Uli kkede sunumasiku, ku Bupati. Ula langa ansi aa nyika. Takukwe akwalo ii—ii mayuwe likonzya kusika aa maanzi kakutakwe (Nguwe) nkwiinda ku kuzumizya Kwakwe; i lwizi talu konzyi kweenda; itu tali konzyi kweenda; muyuni takonzyi kuuluka. Oh, lilelekwe Zina lya Mwami!

122 Ula atala ku beendelezi a basinguzu boonse. I nyika yaka Mu pa zina lyaansi maningi likonzya kuletwa; Leza waka Mu pa zina lyaatala maningi lyakali kukonzya kupegwa. I nyika yaka Mu bikka aansi mbuli mbo bakali kukonzya ku Mu cita, mu cuumbwe ca zibi; pele Leza waka Mu busya kuya Kujulu maningi. Uli kujulu loko mane We elede kulangila ansi kubona Julu.

Liso lyakwe lili aa kayuni,
Alimwi Ndi lizi kuti Ula ndilangilila.

123 Ula kulangilila. Uli izyi miyeeyo yoonse eyo ili mu mizeezo yako. Uli izyi micito yoonse njo panga. Uli zyi zintuzyonse zijatikizya nduwe. Mbo mbubo.

124 Yebo wati, “Pele, Nda kawa, Mukwesu Branham.” Oko takubambi lwardaano noluceya. Uli zyi ncobeni awo mpo kawida. Uli zyi ncobeni awo mpo bede.

125 Yebo wati, “Ee, Mukwesu Branham, Nda kainka Ka tawo, awalo. Nda kajisi coolwe, ciindi cimwi, ca kukanana. Nda kajisi coolwe, ciindi cimwi, ku—ku kuba Munakristo. Nda kajisi coolwe. I mukambausi waka bamba kwiitwa, kwalo Nda keelede kuunka. Nda kacisola lomwe, pele Nda kakakilwa. Nda kacita *eci, eco*.” Takukwe makani eco nco kacita, Walo uci bikkide meso Aakwe ali nduwe.

126 Abo basikwiiya bakainka Ka tawo. Alimwi oora lya mudima maningi, cindi oyo dyabulosi naka bagusya kuzwa awo, kuzwa ku Busyu Bwakwe, wa katalika kubaumya guwo pati.

127 Ndiza eco ncencico nca cita kuli nduwe sunumasiku. Inga wakupa kkulenge. Inga wa kupa *ceeci*. Inga wa kupa *ceeco*. Inga wakupa muunzi inyongene. Inga wakupa moyo utyokede. Inga wakupa kulibilika. Inga wakupa kuciswa mutwe. Ta ndizi nca yoocita. Pele kuli cintu comwe nce Ndi zyi, ncakuti Leza uci bikkide meso Aakwe ali nduwe. Eli inga lyaba oora lyako lya mudima maningi. Ta ndizi; Leza ulacita.

128 Pele moonya mu oora buyo eelyo lya mudima maningi, cindi nibakali kutandila kulibambila kunyikila, mpawo Jesu wakaboola keenda, kuzwa ku maanzi, katalibilikide pee. I

mayuwe mapati akayalana kumbele Lyakwe, mbuli Mbwa kali kweenda.

Petro wakati, “Mwami, ikuti na oyo Nduwe, ndilailile kuboola kuli Nduwe.”

Wa kati, “Ko boola. Koenda awa.”

¹²⁹ “Amulombe, nkabela muyo tambula; amuyandaule, nkabela muyo jana; amukonkomone nkabela kuyo julwa kuli ndinywe. Nkambo onse oyo ukonkomona, uyo julilwa; oyo uyandaula, uyo jana.” Nincobeni. Walo uci langilila. Alimwi cintu cigambya kuli ncico, cindi abo basikwiiya niba taka jisi lugwasyo a bulangizi, elyo cindi Jesu nakaba sikila, cakali cintu luzutu cakali kukonzya kubagwasya, nkabela baka Mu yoowa. Ba katilimuka nkambo ka Nguwe.

¹³⁰ Elyo Nda amba asunu, mweenzuma, kuti cindi cisi cakakilwa, cindi bantu bakakilwa, cindi bantu mu bukkala bakakilwa, awo mbungano mpoya kilwa, awo zintuziyonse zimbi mpo zyakakilwa, ciboneka mbuli kuti twa nyonyooka cakumaninina. Alimwi kanji kufumbwa ciindi, kufumbwa oora, inga wamvwa ku kwiila, elyo toka konzyi kwiinda mu kukwiila kusikila inyika yoonse ika nyonyoonwa do. Kubikkwa komwe kwa mabbomba inga kwacita. Nku koonse nkoелеde kucita, lyomwe buyo. Ta beelede kusiya Moscow. Bala konzya kukkala mpoonya awo a kulosya yomwe mu Fourth Street, mu Louisville. Elyo inga twa imikila mpoonya awa a kulosya lyomwe mu Moscow, amwalo.

¹³¹ Ino kuyooba buti cindi maato aya mapati nakkede mu lwizi mbuli boobu, antomwe a marokketi akayiisigwa kaali ku madolopo? Yomwe ku lubazu *olu*, kwiiya nzila *eyi*; a imwi ku lubazu *olu*, kwiiya nzila *eyo*. I ntaanzi yaguma, eyi uyo guma munzila eyo.

¹³² Ncinzi ciya kucitika? Mbubotu nzi muunzi wako ncouyo kucitila mpawo? Mbubotu nzi mali ako ncaya kukucitila mpawo? Mbubotu nzi mweenzinyoko musankwa ncaya kukucitila, na mweenzinyoko musimbi ncaya kucita? Mbubotu nzi cili coonse nco ciya kukucitila? Ikuti na toluleme kuli Leza, wa nyonyooka, kwa ciindi a Butamani.

¹³³ Eli ndi oora lya mudima maningi inyika eyi ndoya kasola kulanganya kuzwa ku matalikilo aa ciindi. Ta kunabede ciindi mu makani oonse akale aa inyika ayo amudima mbuli mbo kubede lino.

¹³⁴ Kkulenge lili mukweenda cakutanyoneka. Amuyeeye buyo, kuti . . . Nda kamvwa kaambo buzuba bumwi kakuti, kuzibya mbuli kooku, “Kuti kuyooba bantu banji bayofwa mu America mwaka uno, kuzwa ku kufweba misanga yatombwe, kucitya kkulenge, elyo liyofwa mwaka oyu mu America, kwinda bakajaigwa mu myaka yone mu Lumamba luna Korea.” Kkulenge lili mukweenda cakutanyoneka.

135 Malwazi ali mukucitika, alimwi zintuzyonse zili mukucitika. Ee, ta tuzi cakulangila. Bamadokotela tabazi eco mwa mwaita malwazi, aboobo baamba kuti ntuzunda. Ino *ikazunda* niinzi? Kabuzye dokotela. Ncintucimwi eco nca tazi, walo waamba buyo kuti, “Kalo nkazunda.” Nku koonse kuliko.

136 Kuli tuuka tuniini twa kaindi a madaimona auluka ayo muntu nga taninga mwwide kale. Zintuzyonse zili mu kweenda. Zintuzyoonse, tuli mukusola kucilesya kubelesya zintu zyakunyama. Pele, cindi twa sola kucita ceeci, cimwaya cintucimwi cimbi. Mbo mbubo. Wa pa muntu peninisilini nkambo ka *ceeci*, uyo panga cintucimwi cimbi. Wa pa *ceeci*, cili . . .

137 Uli zwide buyo mu nzila. Leza uli jisi nzila, inga akwalo twa njila muli njiyo.

138 I mabungano akakilwa. I bana Presbyteria bakakilwa. I Methodist yakilwa. I Baptisti yakakilwa. I Pentekoste yakakilwa. I Piligimu Holinessi yakakilwa. I mbungano ya Leza yakakilwa. Twa cita, umwi aumwi, wakakilwa. Mbo mbubo. To konzyi kwaamba kuti, “Ndili muna Methodisti,” akulicita kukwabililwa. Ti konzyi kwaamba kuti uli muna Baptisti akulicita kukwabililwa; Methodist, na Presbyteria, kufumbwa mbonga waba, na Pentekoste. To konzyi kwaamba kuti uli kwabilidwe, kutali ku kuzulilwa ku mbugano, nkaambo mbugano ya kakilwa cabubyaabi.

139 I malwazi ali mukweenda caktanyoneka kusikila, Ndila syoma, faivi kuzwa mu eiti, na cintucimwi mbuli ceeco, uyofwa mwaka oyu, ku kkulenge. Amu ciyeeye. A malwazi a misyobo yoonse, malwazi mapya, a zintu zili mukupasuka, eco cila yoosya ncobeni kuciyeeya.

140 Myootokala ili mukujaya. Elyo buzuba abumwi, bantu baleenzya kuselemuka migwagwa balalibilika loko, a kukwiila.

141 Baa, Nda kali kuselemuka kagwagwa mu Louisville, jilo, nkabela mwanakazi wakali kuyanda kunduuma mbaya mu kagwagwa. Nda kali kweenda mbuli *boobu*, a mukaintu wangu wakali a ndime, elyo Nda kamvwa muntuumwi kunze lyangu. I—i bbunga yakali buyo. . . Elyo mwanakazi umwi wakali kuboneka bufubafuba, kafweba musanga watombwe, waa kati, “Ee, lino, ikuti na tozyi lubazu lwa kagwagwa ndo yanda kweendela, kozwa mu kagwagwa.”

Nda kati, “Ee, omulindu. . .”

Waa kati, “Koumuna!” Nceeco we. Nceeco we.

142 Ncinzi kai? Ba sikansondo. Kunyongana kuyeeya. A bamadokotela bataminina kuti bali naini kuzwa muli teeni ya bana America baciswa kubulizya muli zyakuyeeya. Nababa bamadokota balanganya kulilemeka kwa kuyeeya, abo beelede kuba basikupandulula makani akuyeeya, baya buundumuka

akusondoka. Bali muku baanga ku nsimbi zipati, mu kabunga kalanganya basondokede.

¹⁴³ Ibusondosi baya bwiindila. Kulya nkwela cakwaanganya kuya bwiindila. Mawisiki aya bwiindila. Cibi ciya bwiindila. Kwaanza zibelesyo kuya bwiindila. Kwiina nzila ya kukulesya. Kkomunizimu iya bufumpa mukati mbuli zambangulwe. Takukwe nzila yaku cilesya, nkaambo bali mu mfulumende a koonse kumbi.

¹⁴⁴ Oh, pele, kulelekwe kuli Leza! Mu oora buyo eli lya mudima maningi, mpawo mpaawa wasika Jesu kanjila, a janza Lyakwe litandabete, a kutondezya zitondezyo a zigambyo, a kupa lufutuko a luse ku bantu. I oora lya mudima maningi inyika eyi ndyoya kasola kubona! Cindi, mwaala wa Gibraltar uya kwaanduka mu tubeela, buzuba bumwi. Pele, Mwaala wa makkalo uyo imikila kwalyonse, mbuli ciibalusyo ku bubuke, Kristo.

¹⁴⁵ Leza amu longezye nobantu! Leza amu longezye, nobana! Inga koli mucete. Inga kota noozyi oko cakulya citobela nko cinoozwa. Pele, kuli cintu comwe, uli tambwidwe buya ku Kasensa ka Buumi sunumasiku, mbuli muvubi maningi mu inyika. Ko boola kakutakwe mali, kakutakwe muulo. Uli jukide kuli oonse uyanda.

¹⁴⁶ Ndi oora lya mudima maningi mukwasyi ngo lyakasola kubona. Amulange mikwasyi ipasaukide. Kuli kulekana kunji mu America, kulikke, kwiinda kuli mu inyika yonse kukubikka antoomwe. Kulekela kuli mukweenda cakatanyoneka. Nkuuli kusyomeka a i—i kusinizya a butumbu bwa banakazi besu bana America nko kwainka? Amulange bamaalumi, akonse nkoba cita nkubalika maningi mu migwagwa, kusola kutapaula zintuzyonse mu nzila zyabo, bala konzya, banoselemuka, a kunywa bukoko kabatana kuya ku maanda.

¹⁴⁷ Amulange basimbi besu bakubusyi kaba selemuka tugwagwa, misanga yatombwe mu maanza abo. Aboobo takukwe makani obo kunji sayaansi ya masilike mboi bikka kucenjezya kwakuti, “Ndi kkulenge! Ndi kkulenge!” Tabakwe ndaba. Tabakwe ndaba. Ba yuuntumwida busi mpoonya, nekuba.

¹⁴⁸ Mukambausi inga waimikila kukambauka mu mimuni yakwe ya mazuba oonse, ku baambila kuti cili lubide, nkabela bayo amba kuti, “Oh, yebo sikwiindilizya mudaala.” I nyika ili libambilide ku lubeta, nkabela tuyo citambulula. Maka majwi lyangu, tali kalampi kusikila kuyooba cintucimwi ciyo citika.

¹⁴⁹ Cindi Ne kalubona lubukulusyo olu, lwaka fumpa mu kaindi kaniini. Lwa kaunka konse. Alimwi nkeimvwi okuya, eyo Nyenyeezi yaku Bucedo yakali kulengelela atala lya mulonga, myaka ili makumi obilo yakainda, cindi Na kati, “I Mulumbe uyo fumpa inyika.” Mpawo kwakaba kutilwa kwa Muuya Uusalala,

wa Pentekoste wa cianza cakale, elyo mililo ya lubukulusyo a miswaangano ya kuponya ya vumba nyika.

¹⁵⁰ Ba kalubizya maningi. I mutende wakalemba okuno, calino loko, mu McCrall, na, yaba McCall, cindi mwaalumi oyo naka kkede mu muswaangano wangu kutala okuya ku Minneapolis, bamwi babo, Ba. Peterson abamwi, bakasika kundaambila kuti wakali mu muswaangano. Nda kati, “Kwiina kuzumbauzya pee. Pele kwiina noka zilingula kabotu zyaano zyako. Wa kati A. A. Allen wakalemba bbuku eelyo. Kwalo A. A. Allen taka jisi cintu cakucita a ndilyo. Mpawo, ikuti na obo bwakali bulubizi buli boobo, Ndi syoma kuti bumwi bwabo mbulubizi bunji.” Nda kati, “Nincobeni, bakwesu ba beelela kujana kukazigwa kunji. Ba kalubizya maningi. Oko kuli kabotu. Pele, mukwesu, inga Nda sala kujanwa mu bbuwa lyankondo, nke lubizya, kwiinda kuba sikukazya muntu oyo usola kucita bantu kuti bafutukile kuli Leza.” Ucita nzi kujatikizya ncico?

¹⁵¹ Lilelekwe Zina lya Mwami Leza! I Nguzu zya Mwami Jesu Kristo zili jisilidi buya sunumasiku. Ngo Mwaala ulikke. Mbo bulangizi bulikke. Ndo lusyomo lulikke. Alimwi Kristo wa Zitondezya kuli nduwe.

¹⁵² [Kabeela katakwe cintu aa teepu—Mul.] . . . a kupona, na kutantamuka a kufwa. Ndi oora llya mudima maningi inyika ndoya kasola kubona. Pele Jesu waboola ambali, alimwi Mpali ano lino. Zilongezyo Zyakwe zili jukide. Lubazu lwakwe luli yasadwe. Maanza aakwe ali muku tambikizya. “Alimwi kufumbwa muntu uyanda, aboole kunywa kuzwa ku tusensa twa Buumi, cabuyo.” Ko bamba kusala kwako. Nkoya kwako Kutamani kuyo—kuyo bikkwa ku kulanganya kwako kuli Jesu Kristo. Eci inga caba coolwe cako camamnino.

¹⁵³ Alimwi cindi twa kotamika mitwe yesu lino ku ijwi lya mupailo, Ndila lomba mucizi kuboola ku piano.

¹⁵⁴ Elyo kuciindi muntu aumwi nali mu mupailo, Ndi yanda kuti uciyeeye. Nkokuli nko konzya kuunka sunumasiku? Ncinzi cinga cacitika sunumasiku ikuti na kulwanwa kwa moyo kwa kuuma? Eci inga caba ciindi camamanino nco jisi. Ko ciyeeye eno. Cintu neakuti, sa toko bweza ciindi eci ceelede?

¹⁵⁵ Yebo wati, “Ee, Ndi baanga ndili muniini.” Oh, omukwesu, omucizi, Talemeki ciwa ca musela. Inga wauzabuka muncali cindi nocili muniini na cindi noli mudaala; tacikwe makani. Wabona?

¹⁵⁶ Taata wesu Wakujulu, oyu Mulumbe twa upa kuli Nduwe eno, mu Zina lya Kristo. Ndi oora lya mudima maningi inyika ndoya bona. Nciindi ca mudima maningi camakani akale aamuntu nasola kulembwa. Kuli tudandamiti mu luwo, ndeke zyeenzegwa abamuzwakule, mbo babaita.

¹⁵⁷ Wa kati, “Kuyooba zitondezyo mu julu; a mu nyika, mizuzumo yanyika mipati kaizungaana mu masena ansininsini,

kubwabuka kwama volukkano; mayuwe mapati mu lwizi.” Wa kati, “I lwizi lulavuuma. Moyo wa muntu ulawizuka.” Nincobeni. I inyika taizi cakucita. I bbomba taanzi lya atomiki lila caamba. “Kunyongana akulibilika kwa ciindi, mafwabi akati ka masi.” Wa kati, “Cindi zintu ezi zya kuboola kucitika, mpawo amuka nyamune mitwe yanu mujulu, Lununuko lwako lwaswena afwaafwi.”

¹⁵⁸ Cindi Nda yeeya okuya, abo ba Juda. Nda kaibona nyenyeezi yakaindi ya ziimbi zili cisambomwe iya Davida, ndembela yakaindi maningi mu inyika, kailengelela kulaale. Nkaambonzi masi takonzyi kwiibona? A kuyeeya, kuti cisi cesu cini ciyandwa ciyo kkamantana abama Arabu, kuboneka obo. Bayo singanisigwa, masimpe buya. Ba lukaka i—i luse lwa Leza, lino beelede kuyoima ku lubeta. Amwaibone eyo ndembela yakaindi kailengelela okuya! Amulubone lukula kayutuka mbuli kusyuuka kwa dubaluba! Amubabone abo ba Juda kaba jokela kuzwa kumusanza kulaale mu Iran, bakali kookuya kwa myaka ili myaanda ya makumi obilo ayosanwe! I Bbaibbele lyakati baya kubwezegwa kujoka ku Jerusalemu atala amababa aa sikwaze. Ku aya ma United Airlines mapati kaabajosya atala lya mababa aa sikwaze, mbuli mbo kwkabede. Balo kabaseluka kuzwa mu maato, a kulanga, a kwaamba kuti, “Uli kuli Mesiya?”

¹⁵⁹ Wa kati, “Cindi musamu wa bukuyu wakusonsa delema lyawo, mula ziba kuti mainza aswena.” Tula ibona kaisyuuka. Alimwi tula abona masamu oonse ambi kaasyuuka delema. Tu lizi kuti cili afwaafwi. Twa mubona Ishimaeli a Izaka, kulaale ku mulyango, kaba lwana, mbuli buyo Mbo kaamba. Cisinsimi coonse ndyoonya lino cili mukuba. Leza, koba siluse a kufutula basweekede.

¹⁶⁰ Ikuti na kuli umwi awa sunumasiku, Mwami, Oyo Uku yanda, kanana kuli moyo wakwe mukazi na mulombwana ndyoonya lino, kwayanda inga lyaba oora lya mudima maningi. Kwayanda inga tii twali ziba. Inga kwaba bamwi awa bata mvwisiyi kuti eli ndi oora lya mudima maningi, pele lili obo. Ndiza Saatani wakaba kkutya loko mu zintu zya inyik, kusikila taba cizibi pe.

¹⁶¹ Yebo wakati, mu Bbaibbele, “Uli cinswe, ulipengede, ulisampaukide, uli moofu, elyo to ci zyi.”

¹⁶² Leza, kopa, sunumasiku, kuti baalumi a banakazi, balombe a basimbi, kuti ba mpempenukwe akuziba kuti eli ndi oora lya mudima maningi inyika ndoya kasola kubona. Lino ko cipa, Mwami, kuti na kuli umwi awa uta Ku zyi, ba boole boola cabubotu a cabubombe ku ciingano, sunumasiku, akumu zumina Kristo mbuli Mufutuli wacigaminina.

¹⁶³ Sa kuli kulanganya kuli boobo, a mitwe yesu kiikoteme, unga wayanda kwiibalukwa mu mupailo mbuli mbo tu jala

kuswaangana? Sa inga watambika janza lyako kuli Leza, akuti, “Kondi ibaluka.”

164 Leza aku longezye. Leza aku longezye. Leza aku longezye, a yebo, a yebo, a yebo. Leza aku longezye kusule okuya. Elyo yebo, omulindu, iyyi. Sa inga kwaba umbi kakutanaba kujala? Leza aku longezye, omulindu muniini.

165 Yebo wati, “Mukwesu Branham, sa eco caamba cintu cili coonse cindi Nda tambika janza lyangu?” Ciyaamina buyo ali ceeco nco kanzila.

166 Sena ulizi, cindi watambika janza lyako, ulasusya mulao oonse wa sayaansi? Sena ulizi kuti janza lyako lyeede kuti kali lengelela ansi, nguzu zikwela zilitola ansi? Yebo ulizi, cindi watambika janza lyako, citondezya kuti kuli cintucimwi cigambyakwiinda, muli nduwe, ca bamba muzeezo? Cintucimwi citali cakunyama. Cintucimwi citali casayaansi. Walo muuya uli muli nduwe, waka kubamba kususya nguzu zikwelela ansi, kwiinda ku Cilenge cigambyakwiinda muli nduwe, kutambika janza lyako kuli Leza waku Julu, akuti, “Nda mutambula lino Jesu mbuli Mufutuli wangu.” Sena ulizi kuti walo muuya muli nduwe ucita ceeco? To konzyi kucicita omwini. Eco nce caamba, lwandaano akati ka Buumi a lufu.

167 Ikuti na toluzyi, tambika janza lyako kuli Nguwe. Ikuti na Ula kabona kayuni, Ula kubona ayebo. Masimpe.

168 Lino, kuciindi nokkoede moonya mu cuuno canu, ikuti na uyanda kboola ku cipaililo kuzo paila, cili kuli nduwe. Ikuti na uyanda kuti kokkede mu cuuno cako, tula kukombela. Inga wa bamba kusala kwako kuba nzila njo yanda kukomba. Leza uya kumvwa. Kuli maanza manji mujulu.

169 Lino, ikuti na ulayanda, alimwi uyanda Leza ku kucitila, mpoonya awo Mpa kapa kulamwa, mpoonya aa kasena ako keni, Ula kugusya kulamwa kuzwa kuli nduwe. Uyo bweza lubeta lwako kuba aali Nguwe. Alimwi Wa kalu bbadelela kale.

170 Mpawo Uyo ti, “Taata, bikka kaambo kakwe koonse kuli Kangu. Ka sitikizigwa.” Leza mpawo ula kupa Muuya Uusalala, mpoonya awo mpobede.

171 Sena wali kucikanzila ncobeni cindi no tambika janza lyako? Ikuti na wacita, lino atu kombe.

172 Omufutuli Uulelekedwe, Ta ndizi obo busiku mbo buyooba bwa nkambauko yangu yamamanino. Ndi yanda kukambauka imwi aimwi mbuli kuti yakali imwi yangu yamamanino. Nkambo Nse zyi cindi Noya kwaamba kuti, “Kwa mana lino. Boola ku Muunzi.” Nda lomba kuti Undi bambe. Ndi yanda kukkala, ku kambauka Ijwi. Nda kubona kubula kwa Makanimabotu, a nguzu Ngo wajisi aa mukowa wabantu. Pele omuno mu cisi cesu cini cibotu cina America, twa kabona buteteete loko, buvubi, mali, zintuzyonse.

¹⁷³ Oh, ta tukonzyi kuzumanana mbuli boobu, kakuli bunji bwa inyika ifwa nzala. Twa kasaninwa a kusamikwa kabotu, alimwi tuli jisi maanda esu, myootokala yesu. Ta tuyandikani cintu, kakuli ta tuzi kuti tuli “basampukide, bapengede, boofu,” kukanana kumuuya, “basicinswe,” batakwe Bulowa bwa Mwami Jesu. Nekuba, inga katu jisi bumembala bupati mu mbungano. Inga twaba a bwiime bupati kubuleya mu masena aengelede. Inga twa sama kabotu, kulya kabotu. Pele, O Leza, kujatikizya buntu obo!

¹⁷⁴ Lino, mu oora eli lya mudima, Ucili waano, nkaambo Ubikka kulamwa ku myoyo. Kwali maanza masyoonto, Nda yeeyela, kkumi aabili; inga Nda lubila. Kwayanda ali kutandilila na kuceya kuli boobu. Ta ndizi, Mwami, pele Uli muzyi umwi aumwi wabo.

¹⁷⁵ Elyo lino, mukusinizya, mu mupailo wa kujala, Nda baleta cabubotu a cabubombe ku matende Aako, mbuli bube bwa nkambauko yangu sunumasiku, mbuli micelo ya Mulumbe. Nda baleta kuli Nduwe, Mwami, mbuli mbo batambika maanza abo kuli ndime kutegwa baibalukwe mu mupailo. Alimwi bali mukufugama lino mu myoyo yabo, aaku ciingano. Ba tambule, Taata. Babweze mbuli bana Bako bayandwa. Alimwi kufumbwa cikombelo nko baunka, kufumbwa mbocinga caba, oh, akube kuti bakabe basilumamba ba mipailo. Akube kuti bakabe basikusandula bantu; kubeleka, nkambo busiku bula boola. Ko cipa, Taata. Babweze mu kumamela Kwako, a kubalongezya a kubapa kuyandisya kupati kwa myoyo yabo. Alimwi akube kuti Muuya Uusalala ulelekedwe uzuzye maumi abo. Nkambo twa cilomba mu Zina lya Kristo. Amen.

¹⁷⁶ Mbangaye bamuyanda Mwami Jesu a moyo wabo oonse? Oh, sa Tali mubotulok? Mbangaye balimvwa kukumbwa koonse? Mbubonya mbuli Mwami kuti Wali selukide kuzo bweza cikumbyo cipati aku cikumba kuzwa coonse. Oh, ma!

¹⁷⁷ Kotupa obo bulile bwa kaindi, Nda syoma, ni nyimbo ya Saluветioni Armi, “Ncinzi cikonzya kusanzya cibi coonse? Takukwe pele i . . .” [Mbunga yaamba, “Bulowa bwa Jesu.”—Mul.] “Ncinzi cikonzya kundi ponya alubo? Taakwe cita i . . .” [“Bulowa bwa Jesu.”] Mbo mbubo. Atu yimbe, toonse antoomwe, lino.

Ncinzi cikonzya kusanzya zibi zyesu?
Takukwe cita Bulowa bwa Jesu;
Ncinzi cikonzya kundiponya alubo?
Takukwe cita Bulowa bwa Jesu.

Oh, kukunka kuyandisi,
Oko kundi tubya mbuli caanda;
Taakwe kaseensa kambi nke Ndizyi,
Takukwe cita Bulowa bwa Jesu.

178 Sa eco tacili cibotuloko? Mula ziyanda na ziimbo ezyo zyakaindi? Oh, ma! Ndali kuyanda kubona cintucimwi lino. Nguni umwi wanu . . . Boonse ba Methodisti mutambike maanza anu. Ncibotu. Boonse ba Baptisti mutambike maanza anu. Sa nkobali ba Piligrimu Holinessi? Mutambike maanza anu. Nazareni? Mutambike maanza anu. Mbungano ya Leza? Mutambike maanza anu. Presbyteria? Mutambike maaanza anu. Sa inga kwaba ba Katolika? Mutambike maanza anu. Amulange mabungano aindene ali omuno!

179 Lino kuciindi no twiimba eyo alubo, ino ncinzi ciponya bana Presbyteria? Taakwe cita Bulowa bwa Jesu. Ncinzi ciponya bana Methodist? Taakwe cita Bulowa bwa Jesu. Ncinzi ciponya bana Nazareni? Taakwe cita Bulowa bwa Jesu.

180 Ncinzi cibamba . . .? Mbangaye bana Pentekoste? Nda luba kubuzya ceeco. Mbangaye bana Pentekoste omuno? Mutambika maanza anu. Lino bantu babona. Ba lati tuli mbungano ya Pentekoste. Kwali maanza osanwe ainka mujulu, aba Pentekoste. Mpaawo we.

181 Ta tuli bana Pentekoste, mu kabungwe. Tuli Mbungano ya Leza muumi. Tuli bana buyo ba Leza. Tuli bana Presbyteria. Tuli bana Methodist. Tuli bana Baptisti. Tuli bana Lutherani. Tuli bana Nazareni. Tuli bana Pentekoste. Tuli bana Piligrimu Holinessi. Toonse tuli obo. Nkambo toonse tuli bomwe, muli Kristo Jesu. Ncinzi caka cicita? *Eci!*

Ncinzi cikonzya kusanzya cibi cangu?
 Takukwe cita Bulowa bwa Jesu;
 Oh, ncinzi cikonzya kundiponya alubo?
 Takukwe cita Bulowa bwa Jesu.
 Oh, kukunka kuyandisi,
 Oko kundi tubya mbuli caanda;
 Taakwe kaseensa kambi nke Ndizyi,
 Takukwe cita Bulowa bwa Jesu.

182 Sa Tali mubotuloko? Iiyi, munene! Lino kuciindi no twiimba yakuti, *Kunselelo Lya Ciingano*, Ndi yanda bana Methodist, abana Baptisti, abana Presbyteria, abana Pentekoste, abana Nazareni, boonse kusukana maanza kuli umwi aumwi, yaa, kuciindi notu yiimba.

Kunselelo ku ciingano oko . . .

Cenguluka ndyoonya eno, akusukana maanza a muntuumwi.

Kunselelo oko ku kusalazya . . .
 Mpaawo ku moyo wangu Bulowa bwa
 kalambwa;
 Bulemu ku Zina Lyakwe! (. . .?. . .)
 Bulemu ku Zina Lyakwe liyandisi!
 Mpaawo ku moyo wangu Bulowa bwa
 kalambwa;

Bulemu ku Zina Lyakwe!


¹⁸³ Lino obu mbusiku bwa mulalilo, mbuli bantuboonse mbo bazi. Tula lya mulalilo sunumasiku. Alimwi Ndali lubide kujatikizya nguwo kusikila Mukwesu Neville wandi yeezya buya.

¹⁸⁴ Lino mbangaye balimvwa kabotu loko, kuti muli ba Nazareni Pilgrimu Holinessi Baptisti a Pentekoste? Atu bone maanza anu. Ndali kubona awa, muna Baptisti a Methodisti kabaimvwi aa cibumbili, kabasukana maanza. Oh, sa ta tuli. . . Sa tacili cibotuloko kuba mulanda wa Mwami!

¹⁸⁵ Lino tuli bana buyo. Alimwi bana bajisi nzila zigambya loko, nywebo mulizi. Bano kwankwana mu kaindi kaniini mpawo kabasobana kuli ciccilila. Eyo nje nzila mbo tweelede kuba. Kogwisya buyo kukwankwana, kuzwa ku ciwezo cako, a kuzumanana kubusena kuba akuba amisaalo minji, kosobana a zidooli zyako, a kufumbwa ceelede kucitwa.

¹⁸⁶ Lino tu jisi lubukulusyoo luboola. Kwalo tuya kwiimba Makanimabotu, akukambauka Makanimabotu, a kuba aciindi cibotu. Mbangaye bayo lukombela? [Mbunga yaamba, “Ameni.”—Mul.] Oh, eco ncibotu. Lino, mukasike kuzo tugwasya. Koya ku fooni. Kotola nzila yoonse niini njo konzya, kutamba bana boonse kusika. Baambile kuti, “Muboole kutala eno, aku tugwasya eno. Tu yooba a luswaanano ku Ijwi.”

¹⁸⁷ Lino nciindi ca mulalilo. Bantubonse bali tambwidwe kulya mulalilo antomwe andiswe, maminiti buyo masyoonto. Bala baleta atala okuno ku cipaililo, alimwi, maminiti ali kkumi na kkumi aosanwe, mpawo kwamana, kwamana tucita kusanzyanya matende.

¹⁸⁸ Mukwesu Neville lino ulabala Lugwalo lujatikizya mulalilo, kuciindi notubatama ncobeni eno, mbuli mbo tulya mulalilo. 

57-0407^E Mpawo Jesu Wakaboola
Branham Tabernacle
Jeffersonville, Indiana U.S.A.

CHITONGA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitaminidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyobolwa mu cianza cakujokolosya, kusandululwa mu misyobo iimbi, na kubelesegeka kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org